

粵雅堂叢書

粵雅堂叢書

石柱記

曩予視浙學七十二城紛紛上地志偶檢閱之蕪穢紕
繆不一而足吳興尤甚族子苴畦醞釀經史剏爲郡志
發凡起例一洗前志之陋己卯冬弭檝雪川已樂觀其
書成今開正上浣來自秦郵將渡河北上金臺留飲十
日酒酣耳熱之頃問其志何以不梓苴畦告予曰某之
爲是書也大約憑史不憑志循理不循情畧舉一二如
沈約弑其君舊志尊爲名賢之冠春秋血食沈文叔一
門忠孝舊志削而不書予並表出之近世有兩節婦焉
一王烈婦夫亡棄孀姑襁褓諸兒自溺死一孫烈婦夫

亡子然一身不食七日死予獨爲孫作傳一時賢王者
雖多方陳請不少回夫是以譁然議論蠭起不知者以
爲改竄舊本殆不可信也其知者以爲不虛美不隱惡
史體也而非志體也於是遂不果梓予聞之矍然因喟
直道之難行也夫太史之簡董狐之筆千古能有幾人
而欲踵其事而爲之其不爲造物者所忌蓋亦鮮矣顧
以子之才品不羣不屑寄人籬下甘自留落旣難見信
於有司又不獲告無罪於鄉井子何徒自苦少陵詩云
本賣文爲活翻令室倒懸子第安於所遇而已而何此

中技癢終不能自己又箋釋石柱記將布諸梨以序見
屬不辭而爲之詞且慰之曰此不過湖志之一斑耳姑
先行之全志具在當世不乏知音必不久闕笥中徒飽
蠹魚之腹也晉安愚叔開極題

湖州石柱在宋初字已漫漶歐陽永叔謂其筆畫奇偉
非顏魯公不能書於是宋次道集魯公詩文刊於金石
者編成一十五卷則石柱記存焉孫莘老知湖州聚境
內碑碣築墨妙亭貯之凡三十二通記其一也所記山
川陵墓廟宅旁及屏風竹帳雉尾扇顧唐設五縣而記
遺其二或當日有之次道編集時殘闕未可知爾吾友
鄭子蒞畦旣輯府志一百二十卷成又箋釋石柱記四
卷復商之予補遺一卷考證詳覈可稱周見洽聞矣墨
妙亭之建蘇子瞻爲之記一時詩流寄題踵至今其遺

石因府治卑溼用填淤泥已久夫峴山之碑一沈江底
尙覲其深谷爲陵若亭中諸碑未淪於水假有賢太守
發而復樹之何難與莘老並美又安見石柱之不可再
覲乎竹垞老人朱彝尊

顏正烈文忠公泐吳興山川陵墓古蹟於石柱樹杼山
年遠剝落孫莘老取而貯之墨妙亭更六百餘禩竟歸
銷滅鄭子苴畦搜得真本補亡訂譌箋釋盡善予旅寓
秦郵苴畦輕舟來訪出一編見示亟讀之覺山明水秀
酒美茶香歷歷在我目前秦郵去吳興雖隔越江湖然
俱禹貢揚州之域莘老以郵人典湖郡收殘拾廢志在
不朽予今居其故里秋清月白尊珠光於璧社之陰當
開苴畦所貽下若春呼莘老而弔之曰石柱記鄭子已
箋釋之矣行將有事於吾公墨妙亭小志莘老雖遙當

必聞聲而蹶然笑也蘿邨蔣國祥

不亦言乎

吳興山水秀麗人文輻輳治博士家言之外兼該古學
家有藏書予往在試院有句云書肆架多陳汲冢儒林
家自握靈珠紀其盛也茝畦鄭子予兩試俱高等以郡
志殘闕旁諏博考成一百二十卷向已歎其該洽今來
淮上示予箋釋石柱記一篇魯公宦轍所屆多冥搜勝
蹟如麻姑碑華嶽廟石幢不可數記大抵忠孝人必具
真性情所值山川人物未有浮雲過眼如郡有錫山而
不知者雖其中閒有譌誤恐亦如子瞻以赤鼻爲赤壁
借以張所寓之邦不足深辨也鄭子抽其腹笥引而伸

之亦已勤矣予老且憊度不復與吳興山水人文作緣
對此編泣然點筆而爲之序康熙歲次壬午五月旣望
楚黃張希良

志吳興者張元之山墟名王韶之郡疏山謙之記張文
規雜錄陸羽圖經顧雲總載陸龜蒙實錄左文質統記
紹興續圖經淳熙舊編皆郡官寄公所作非生長於湖
者安能備悉湖事今諸書不概見宋嘉泰中樞密院編
修談鑰始以郡人志郡事而陳振孫譏其書草率未得
盡善明成化志訓導陳頎作嘉靖志訓導浦南金作萬
厯志假託爲唐一菴作掌故集華亭徐獻忠作相沿舛
錯莫可徵信頃借書醞舫得宋槧石柱記載山川陵墓
亡者三之一其存而不可信者亦三之一吾湖浙西佳

郡何不幸而使數千百年文獻無徵至於此極邪竹垞先生惜其殘闕爲補記二縣旣完且好余乃一一箋釋證其所可信復辨其所不可信甫脫橐先生見之賞擊命鈔副本藏曝書亭辛巳七月晦日歸安鄭元慶識

三年築舍人莫不姍之余作志且七八年成而弄之匿衍則與不成何異用是愴怳不得意去冬典書兩大簾作汗漫之遊孟城卒歲橐中裝盡矣復寄食淮陰會吾師張石虹先生纂格物外編不廢芻蕘甚許可是書以謂辭不費而指頗深遠數將葺剡木歸商之同好咸鼓

舞開雕匝月而竣嗟乎吾半世精神積年視聽豈僅託
於是乎管窺蠡測茈茈自慙夫亦曰不賢者識其小者
而已壬午日長至桑苧園南鄰處士載書於吳閭之白
蓮華涇

石柱記箋釋卷一

蒞畦 鄭元慶 箋釋

湖州石柱記文字殘缺其存者僅可識讀考其所
記不可詳也唯是筆畫奇偉非顏魯公不能書耳
公忠義之節明若日月堅如金石自可以光後世
傳無窮不待其書然後不朽然公所至必有遺跡
故今處處有之唐人筆蹟見於今者唯公最多視
其鉅書深刻或託於山崖其用意未嘗不爲無窮
計也蓋亦有趣好所樂爾其在湖州所書爲世所

傳者唯干祿字書放生池碑尙多見於人家而干祿字書乃楊漢公摹本其真本以訛缺遂不復傳獨予集錄有之唯好古之士知前人用意之深則其湮沈磨滅之餘尤爲可惜者也

集古錄

石柱記殘缺不見年月及書撰姓名其字畫顏魯公書也凡湖州諸縣皆記其山川前古陵墓

集古錄目

石柱記舊在杼山今在墨妙亭

輿地碑記目

按魯公年譜大厯七年壬子公年六十四九月至東京除湖州刺史十一月發東京八年癸丑正月至任七月追建放生池碑銘是年有題三癸亭酬陸處士折青桂花見寄詩水堂送諸文